

spes erat, fore, ut institutione Viri illustris fruerer, qui, quum primus fundamenta litterarum Indicarum, nunc tam laete florentium, in hac Universitate iecerit, etiamnum pergit eas iuvenili prorsus ardore fovere et promovere. Nec spes me fefellit. SCHLEGELIUS enim, licet multis iisdemque gravissimis laboribus occupatus, haud dedignatus est scholis suis Indicis memet adsciscere. Quo beneficio quantum promotus sim, mente probe sentio, verbis autem exprimere non possum.

Ad castra itaque Bonnensia advectus, repperi, integrum istius dramatis exemplar, a Viro Cl. BROCKHAUSIO descriptum collatumque, in manibus esse LASSENI, qui vix rogatus id mecum liberalissime communicavit. Quam opportunitatem magna laetitia arripiens editionem huius dramatis adornare decrevi. Qua mea opera si ullo modo cognitio rerum Indicarum augebitur, primaria eius rei laus BROCKHAUSIO erit attribuenda.

Codices, ad quorum fidem textus praecipue est constitutus, hi sunt :

- A. Codex Devanagaricus, recens, mendosus, in primis pagellis tantummodo adhibitus.
- B. Cod. Devanag. (Samvat. 1754) omnino bonus. Verba Sanscrita et Pracrita lineolis rubris inter se seiuncta sunt, passimque adiecta est vocabulorum, plerumque faciliorem, explicatio, nonnumquam enotata etiam est scripturae discrepantia.
- C. Codex Devanag. antiquus, satis bene castigatus. Desunt in fine aliquot folia.
- D. Cod. Bengalicus ex libris COLEBROOKII, in solo actu primo collatus.

In textu exhibendo hoc consilium secutus sum, ut